

17/08/2002

'Tindakan Bunyamin bersembunyi bukti bersalah'

KUALA TERENGGANU, Jumaat - Datuk Seri Dr Mahathir Mohamad menyifatkan tindakan bekas Ahli Parlimen Bachok, Bunyamin Yaakob menyembunyi diri apabila dipanggil polis untuk memberi keterangan, sebagai bukti dia bersalah.

Perdana Menteri berkata, Bunyamin yang membuat fitnah itu, sedar pembohongannya itu sehingga terpaksa bersembunyi.

"Sekarang jelas sekali dia melempar fitnah dan dia dah lari. Sekarang dia disuruh serah diri. Tetapi serah diri atau tak serah diri, hakikatnya ialah dia lari, dia lari bermakna dia salah," katanya dalam sidang akhbar sempena lawatan rasmi seharinya ke Terengganu, hari ini.

Bunyamin, 56, pada ceramah Pas di Pusat Tarbiyah Islamiah Kelantan di Pengkalan Chepa, pada 15 Mac lalu mendakwa konon Dr Mahathir dan cucunya menonton video lucah.

Petikan ceramahnya itu disiarkan Radio Televisyen Malaysia baru-baru ini dan susulan daripada itu, tiga aduan polis dibuat di sini, Pasir Mas (Kelantan) dan di Baling, Kedah.

Rabu lalu, Ketua Jabatan Siasatan Jenayah Kelantan, Asisten Komisioner Abdul Rahim Jani, berkata polis gagal mendapatkan keterangan daripada Bunyamin yang dipercayai sudah menghilangkan diri dan berada di negeri lain.

Mursyidul Am Pas, Datuk Nik Abdul Aziz Nik Mat meminta Bunyamin tampil secara sukarela untuk memberi kenyataan bagi membantu siasatan polis.

Dr Mahathir berkata, Bunyamin perlu bertanggungjawab terhadap tuduhannya itu dengan mengemukakan bukti dan bukan hanya berani menghasut rakyat membencinya.

"Kita nak tahu apa bukti dia boleh buat dakwaan begitu lantang sekali, bukan main sombong lagi menuduh Perdana Menteri melihat gambar lucah dengan cucunya. Ingat saya manusia jenis apa?" katanya.

Perdana Menteri berkata, lebih dikesali ialah mereka yang menghadiri ceramah politik itu seolah-olah percaya dengan tuduhan tidak munasabah itu.

"Demikianlah berjayanya Pas menghasut dan membentuk pemikiran pengikut dia sehingga mereka ini tak boleh dengar kebenaran. Mereka akan dengar pemimpin mereka saja, kalau pemimpin kata putih, putihlah, jikalau kata hitam, hitamlah," katanya.

Terdahulu, dalam ucapannya pada majlis pemimpin bersama rakyat, Perdana Menteri berkata Bunyamin tidak sepatutnya melarikan diri jika mengakui berjuang dengan parti Islam yang konon sentiasa bercakap benar.

"Apakah sebab orang yang mendakwa dirinya Islam dan ahli parti Islam sanggup melempar fitnah yang dilarang keras oleh agama hingga fitnah dianggap sebagai lebih bahaya daripada membunuh. Orang yang semacam Bunyamin ini hanya ada dalam Pas...dalam Umno tak ada," katanya.

Dr Mahathir berkata pemimpin Pas bukan saja gagal menghentikan fitnah terhadap pemimpin kerajaan Pusat sebaliknya menggalakkan perbuatan itu termasuk memfitnah Tuhan sebagai mencarut dan samseng.

"Tetapi Nik Aziz dan kawannya melemparkan fitnah berleluasa, tak kira sama ada ia benar atau tidak.

"Sebab itu Bunyamin bercerita dengan beraninya, cukup berani di hadapan orang Pas termasuk perempuan bahawa kononnya saya lihat gambar lucah dengan cucu saya.

"Fitnah ini terus berkembang apabila Pas pula mencetak rakaman video

ceramah itu untuk diedarkan di kalangan penyokong Pas dan penduduk kampung," katanya.